

**Kalaallit Nunatsinni aalisakkat qaleruallillu tunisassiassatut qaqqineqartartut ingitaqarani tamakkiisumik tunisassiarineqartarnissaat anguniarlugu Naalakkersuisut UPA2017-imi nassuiaammik saqqummiusseqqullugit peqquneqarnissaannik Inatsisartut aalajangiiffigisassaatusiunnersuut.**

(Inatsisartunut ilaasortaq Jess Svane, Siumut)

**Akissuteqaat**

(Inuussutissarsiornermut, Suliffeqarnermut, Niuernermit Nunanullu allanut Naalakkersuisoq)

**Siullermeerneqarnera**

Apeqqutip pingaarutillip taassuma saqqummiunneranut siunnersuummik saqqummiussisumut Naalakkersuisut qujarusupput. Nunatsinni pingaarnepaatut isertitaqarfiuvoq aalisarnej, suliffippassuarnillu pilersitsisarlu. Taamaattumik nunatsinni aalisarnermik inuussutissarsiornerup ineriartortittuarnissaannik qulakkeerinissaq pingaarnersiuermi pingaarnepaat ilaattut Naalakkersuisut isigaa.

Aalisakkanik qalerualinnillu tamakkiisumik atuinerit nioqqutissiornerillu tassaapput ingerlassat illoqarfinni nunaqarfinnilu nutaanik suliffippassuarnik pilersitsisinnaasut.

Taamaattumik aalisakkat sapinngisamik annertunersaata atornissaasa qularnaarnissaat aalisarnermi inuussutissarsiorfimmilu suliasaqarfinni Naalakkersuisut politikkianni pingaartut tamanna ilaavoq. Tamatuma saniatigut aalisakkanik qalerualinnillu tunisassianik nioqqutissiornerup sapinngisamik annertunerpaamik Kalaallit Nunaanni pisassaneranik qulakkeerinissaq Naalakkersuisut politikkeraat. Anguniagaq tassaavoq nunatta imartaani aalisakkat qalerualiillu nioqqutissiarineqartut inuussutissarsiorfimmi sulianik pilersitsinermik taamaalilunilu suliffeqartitsinermik ilapittuuteqarnerat, ingammik nunatsinni nunaqarfinni isorliunerusunilu. Taamaammatt Naalakkersuisut pisanik 100%-imik tulaassuisussaataitanermik sumiiffinni arlaqartuni piunasaqarput, taamaalilluni tunisassiornerup ajunnginnerpaamik ingerlanneqarnisaa qulakkeerniarlugu, nunamilu annerpaamik suliffissaqartitsinissaq anguniarlugu.

Nunaqarfinni isorliunerusunilu aalisarnermik inuussutissarsiornermi annertunerusumik suliffeqartitsinnaanermik misissuineq Naalakkersuisut aallartereepaat. Naalakkersuisoqarfiit akimorlugit suleqatigiissitamik pilersitsisoqareerpoq susasaqartunik suleqateqartussamik. Suleqatigiissitap najukkani ataasiakkaani ineriartortitsinnaanermi periarfissat sammissavai. Tunitsiviit tunisassiorfiillu ataasiakkaat qanoq ineriartortinneqarsinnaanersut qanorlu suliaqarsinnaanerinut periarfissat nalunaarsorneqassapput, imeqarnermut inaallagiarnermullu qanoq inissisimanersut, aammalu qanoq aalisagaqartiginermut paasissutissat. Nalunaarsuineq najugaqarfiit sorliit ineriartortitsinissamut annertusaasinnaanermik periarfissaqarnerusut paasiniaaananermi atorneqassaaq, aammalu najugaqarfiit sorliit ataveqarfitsigut pisariaqartitsinersut.

Misissuinermi ajornartorsiutit sammineqartussat akornanniipput apeqqutit aalisakkat pisari-neqartut timitaasa annertunerusut inuussutissiassanik tunisassiornermi atorneqarsinnaaneri imaluunniit tunisassiassanut allanut atorneqarsinnaaneri. Saniatigut aalisakkanik qalerualinnillu nioqqutissiornerup annertunerusup Kalaallit Nunaanni pisinnaaneranut qulakkeerinissamut periarfissat misissuinerup qulaajassavai.

Nunami maani aalisakkanik tunisassiat annertunerusumik nioqqutissiarinissaasa qulakkeernissaannik anguniagaq Naalakkersuisut inuussutissarsiornermut politikkiani aamma takuneqarsinnaavoq, tassani Kalaallit Nunaanni annertunerusumik nioqqutissiornerup qulakkeernissaanut aqutissiuussinnissamut kissaateqartunik suliffeqarfinnik tapiissutinut aqqissuussat assigiinngitsut aqutigalugit tapersersorniarsarigatsigit.

Taamatut oqaaseqarlutik Naalakkersuisut siunnersuut ilassiluarpaat, akuersissutiginnissaalu inassutigalugu.